



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

38. Kalenderwoche – 15. September 2008

Eduard Sachsenmeyer entwickelt in dieser Woche seinen ganz besonderen Stolz auf Chemnitz und nimmt sich dazu mal die Medien zur Brust.

Hochaktueller Anlass seiner Gedanken ist das positive Abschneiden der Stadt Chemnitz im soeben erschienenen bundesweiten Städteranking der Initiative Neue Soziale Marktwirtschaft (INSM).

Chemnitz ist dort mit einem Sprung von Rang 41 auf 27 sozusagen der „Iborflieschor“ oder auf neudeutsch „Shootingstar“ unter den deutschen Großstädten.

Fiehrs Gemiehd

De Zeidung dud eim doch immor widdorma iborraschn! Nee, isch meschde werglich nisch off mei däschliches Bläddl zum Friehschdigg vorzischdn missn! Also, nisch dass Sie jeczde denkn dun, isch due de Zeidung zum Friehschdigg fressn..., nee, isch du se bloß mid de Oochn vorschlingen - sozusachn. Was die abor ooch jedn Daach zusammdrachn dun aus dor ganzn Weld bis niebor nach Limbach-Obofrohna! Von dor ganz großn Bolledigg bis nunnor in de vierde Greislischa, wo Eische Reischnbrand widdorma glorreisch gewonn had. Odor vorlorn. Je nachdähm!

Odor is Eische Reischnbrand gar nisch viede Greisliescha? Isch weeßes nisch genau. Mor kann sich ja werglich nisch alles märgn, was in dor Zedung schdehn dud. Un das is ooch guhd so, dass sich das keenor märgn kann, sonsd däde mor ja dauornd märgn, was die vorsche Woche fiehr een Bleedsinn geschriem haddn. Nee, du kannsd dir nisch alles märgn!

Abor ledzde Woche habbsch mir zweewas gemärgd! Ja! Weil - das was isch mir gemärgd hab, das war was ganz was Seldenes! Es schdand nähmlisch ma was in dor Zeidung, was een Hauch von Bosediefismus hadde. Ja, es war ma was drinne, was bosedief war! Eene rischdische Erfolschmeldung - fasd wie in de friehoren Zeidn. Ma was Obdemisdisches!

Ansosndn dud ja immor bloß drinne schdehn, was wo schief gegang is, wer sisch wo zu Dode gebrachd had, währ Bleide gehn dud, währ sisch ibor was offreschn dud... - ja, un nu völlisch unvormuded un aus heidorm Himmel eene bosediefe Meldung bezieschlich Gemnidz! Und zwar dädn mir in Gemnidz een wirtschafdlischn Buhm hamm. Mir häddn Schdeischorungsradn, die sinn bundesweid Schbidze! Un ooch de Arbeitslosischkeid däde bei uns sinkn. Un es warn noch baar bosediefe Sachn, diese offgezähld hamm. Nee, werglisch - isch dachde ooch erschd in bin in dor falschn Zeidung! Abor wenn mir insgesamd so als Schdadt uns so bosedief endwiggn dun, wieso dud mor dann immor lähsn, was unsre Gomunalbollediggor fiehr Bfeifn sinn? Die machn doch een Bleedsinn nachm annorn, wensde de Zeidung lähsn dusd.

Nascha, jednfalls had misch die bosediefe Meldung ma rischdisch frehlich gemachd. Rischdisch obdemisdisch bin isch dann in dähn Daach hinausgegang. Heidoren Gemiehdes! Un die bosediefe Meldung habbsch mir ooch gemärgd. Es wird ja nu widdor off lange Zeid de ledzde gewähsn sein. Nu is bloß die Frache, gibbds so wenisch Bosediefes aus dor Weld zu meldn odor will keenor was Bosediefes meldn?

Un andornseids dud ooch noch die Frache schdehn - dun de Zeidung immor bloß so schlimme Sachn berischdn, weil das de Lähsor lähsn wolln? Odor missn de Lähsor immor das Neggadiefe lähsn, weil de Zeidung das schreim dun? Was is friehor da - de Schadnfreide dor Lähsor odor de Schgandahlsuchd dor Zeidungsmachor?

Eduard Sachsenmeyer